



16. august 2012

UKA 2012/167

Inatsisartut Suleriaasianni § 33 naapertorlugu aalajangiiffigisassatut siunnersuut imaat-toq matumuuna saqummiuppara:

Nunatsinni ilinniartut amerlanerusut ilinniarnermi naammassisalernissaat siunertaralugu, nuna tamakkerlugu ilinniagaqartunut tarnikkut inooqatigiinnik-kullu siunnersuisarfimmik (studenterrådgivning) Naalakkersuisut pilersitsi-nissamik peqquneqarnissaat pillugu inatsisartut aalajangiiffissaattut siunner-suut.

(Inatsisartunut ilaasortaqaq Kaali Olsen, Inuit Ataqatigiit)

Tunngavilersuut

Nunatsinni ilinniartitaanikkut aqqissuussinerup iluani ilinniagaqartunik pisariaqar-titsi-nertik tunngavigalgu tarnikkut inooqatigiinnikkullu ajornartorsiutaannik qaanginiartitsi-sussanik ullumikkut soqanngilaq. Taamatut ajornartorsiuteqartut socialrådgiverinut socialikkuulluunniit ikiorsiisinnaasunut ilinniartitaanerup avataani suliffeqartunut saniatigoo-ralugu suliaqartartunut innersuuneqartarput nammineerlutilluunniit ujartuillutik, aki akilerneqarsinnaanngipajaartoq akiliutigisariaqartarlugu. Pilersinneqartussa immikkullarissuovoq, piviusunngortinneqartariaqarlunilu ilinniartooqarfiit assigiinngitsut aqqissuussaasumik suleqatigineqarnerisigut.

Ukiut tamarluinnaasa nunatsinni ilinniagaqartut arlalissuit ilinniakkaminnik taama-titsiinnartarput. Ilinniakkamik unitsitsiinnartarneq eqqugaasunut annertuumik inuttut eqquisinnaasarpog inuuiaqatigiinnullu aningaasatigut sunniuteqarnerluttarluni. Ilinniakka-mik maangaannaq unitsitsisarneq suli maannamiit annertunerusumik pitsaaliorneqar-tariaqarpoq tamannalu ilaatigut ilinniartunik siunnersuisarnerup pitsanngorsarneratigut ilinniartullu taparserneqarnissamut pisariaqartitai tunngavigalugit aqqissorneratigut ~~pisinnaasorinarpoq~~ takorloorneqarsinnaavoq.

Naak ilinniakkamik unitsitsiinnartarneq assigiinngiartunik peqquteqarsinnaagaluartoq nalunaarusiat assigiinngitsut tikkuarpaat inooqatigiinnikkut inuttullu ajornartorsiutit taamaatiinnartarnermut annertuutigit pisoqataasartut. Inuttut inooqatigiinnikkullu ajornartorsiutit, ilaatigut inuunermi misigisaqarnerlussimanermik peqquteqarsinnaasartut imaluunniit ilinniarnernerup ingerlanerani qaffassinnaasarput ilinniakkallu ingerlatiinnar-nissaanut aporfiulersinnaallutik.

Siunnersuutip siunertaraa ilinniartut nunatsinni sumiikkaluartulluunniit inuttut ajornartorsiutiminnik sukkulluunniit saaffiginniffissaqalernissaat ajornartorsiutiminnillu manna-mit annertunerusumik ikiorsiiffigineqartalernissaat. Siunnersuutikkut anguniarneqarpoq ilinniartut ajornartorsiutitik pillugit ikiorserneqarsinnaalernermikkut tarnikkut inooqati-giinnikkullu ajornartorsiutiminnik suliarinniffigisinnaasaannik periarfissiinissaq tamassu-malu kingunerisaanik ilinniarnerminnik aallussilluarnerulernissamut periarfissaalissam-mat.

Ilinniagaqartunut tarnikkut inooqatigiinnikkullu siunnersuisarfik inunnik oqaloqateqar-nissamut katsorsaasinnaanermillu ilinniarsimasunik, tarnip pissusaanik ilisimasalinnik

isumaginnikkullu siunnersortinik sulisoqartinneqassaaq. Ilinniagallit taakku aallartisarnermi tarnip pissusilerisut marluk aammalu isumaginninnermut siunnertortit marluk atorfinitsinneqassapoput, taassumalu saniatigut ilinniartunut suliffimmik misiliisunut sungiusarfiuutigisinnaalluni. Siunnersuineq inunnik ataasiakkaanik eqimattakkaartu-nulluunniit ingerlanneqartassaaq, ungasianiillu siunnersuisarneq attaveqaatigut, teknologi aamma elektroniskiusumik periarfissat assigiinngitsut atorlugit ingerlanneqartassalluni.

Pisortanut aningaasatigut allaffissornikkullu kingunerisassat

Aningaasartuutissat pisariaqartinneqartut Ilinniartitaanermut aningaasaliissutit tamarmi-usut iluanni nassaarineqassapput ilinniarfiillu ilinniartoqqortussusertik aallavigalugu aki-leeqataasassallutik. Naliliinera tunngavigalugu, aallartisarnermi sulisuujumaartussasat tassaasapput tarnip pissusaanik ilinniagallit marluk aamma inunnik isumaginninnermut siunnersortit ilinniagallit marluk, imaluunniit inuup ataatsip ukiumut suliarisinnaasaasa sisamanut naatsorsorneri.

Naatsorsuutigineqassaaq sulianut atatillugu ilaatigut nunatta sineriaani angalasoqartarsinnaanera, tamannali killilersimaarniarneqassaaq, siunnersuutaamat teknologi aamma elektroniskiusumik atortorissaaruteqarluni ungasianiit siunnersuisarnissat ilaatigut ingerlanneqartarnissaat.

Namminersorluni inuussutissarsiuteqarnermut aningaasatigut allaffissornik-kullu kingunerisassat

Soqanngilaq

Innuttaasunut aningaasatigut allaffissornikkullu kingunerisassat

Soqanngilaq